



PAENITENTIARIA APOSTOLICA

Prot. N. 644/07/I

BEATISSIME PATER,

Franciscus Petrillo, Rector Generalis Ordinis Clericorum Regularium Matris Dei, Sanctitati Tuae oboedientiae religiosae officia atque filialis devotionis sensus exhibet omnium consodalium, animum etiam repraesentans fidelium turmarum, quae concurrunt ad S. Ioannis Leonardi exuvias, in Ecclesia paroeciali Sanctae Mariae in Porticu in Campitelli Urbis honorifice conditas; et magna fretus fiducia exponit atque supplicat:

Die IX mensis Octobris anno MMIX, quattuor explebuntur saecula a felici transitu a terris in caelum, nempe a die revera natali S. Ioannis Leonardi, presbyteri laboribus et miraculis clari, qui Lucae in Etruria quam artem exercuerat apothecariam deseruit, ut sacerdotio initiaretur. Inde ad pueros doctrina christiana docendos, ad vitam apostolicam cleri instaurandam et ad fidem christianam ubique propagandam Ordinem Clericorum Regularium, postea Matris Dei nuncupatum, instituit, quapropter multas suscepit tribulationes, et Romae fundamenta iecit Collegii de Propaganda Fide, ubi laborum pondere fractus placide obiit.

Unde effloruit, iam erga ipsum adhuc in terris degentem, fervida christifidelium devotio, quae, ad aeternam vitam ipso feliciter translato, ad usque nostra tempora percrevit. Die XVII Aprilis MCMXXXVIII Sanctorum catalogo adscriptus est a Pio Pp. XI, Decessore Tuo v.m.; deinde Patronus apud Deum christifidelium exercentium artem apothecariam, per Decretum Congregationis de Cultu Divino et Disciplina Sacramentorum die VIII Augusti MMVI datum, renuntiatus est.

Venia nimirum concessa a Congregatione pro Causis Sanctorum et libenter consentiente Em.mo Cardinali in Urbe Vicario, urna continens sacras reliquias Sancti Ioannis, peracta canonica recognitione, a die V mensis Octobris proxime venturi usque ad diem IX Octobris MMIX sollemniter deferetur varias in Ecclesias intra fines Dioecesium Lucensis, Veliternae-Signinae, Neapolitanae, Tranensis-Barolensis-Vigiliensis et Neritonensis-Gallipolitanae, necnon, pro magna spiritali christifidelium exultatione, publicae venerationi exponetur.

Quapropter dubitandum non est quin, religiose celebrata quater saeculari memoria Illius, ad permagnos fructus Fidei, Spei et caritatis supernaturalium producendos fidelium animi instimulentur: nimirum ad perennem Evangelii virtutem in sese recipiendam et in fratrum emolumentum diffundendam, Dei opitulante gratia.

Haec autem maxime desideranda saecularium celebrationum sequela facilius obtinetur si Sanctitas Tua Indulgentiae donum paterne dilargiri voluerit: pro quo fiducialiter preces admoventur.

Et Deus, etc.

Die XIV Iunii MMVIII

PAENITENTIARIA APOSTOLICA, vi facultatum sibi speciali modo a Summo Pontifice tributarum, perquam libenter excipit relatas preces et *plenariam largitur Indulgentiam*, suetis condicionibus (sacramentali Confessione, eucharistica Communionem et orationem ad mentem Summi Pontificis) rite adimpletis, a christifidelibus vere paenitentibus lucranda, si cui sacrae functioni vel pio exercitio in honorem S. Ioannis Leonardi peracto, devote interfuerint, vel saltem per congruum temporis spatium, animo piis considerationibus intento constiterint, concludendis Oratione Dominica, Symbolo Fidei, necnon invocationibus B. Mariae Virg. et S. Ioannis Leonardi:

I. - *in omnibus et singulis sacellis Ordinis Clericorum Regularium Matris Dei, vel pastoralis curae sodalium eiusdem Ordinis concreditis*: diebus IX Octobris MMVIII et IX Octobris MMIX (in memoria liturgica Sancti); die I Ianuarii MMIX (S. Dei Genetricis Mariae, in sollemnitate titulari); die XVII Aprilis MMIX (in anniversario canonizationis); die XV Augusti MMIX (in sollemnitate B. Mariae Virg. in caelum Assumptae); die I Septembris MMIX (in anniversario foundationis); die rite determinando pro Iubilaeo christifidelium artem apothecariam exercentium;

II. - *in aliis locis sacris*: tempore urnae peregrinationis.

Senes, infirmi, omnes qui legitima causa domo exire nequeunt, *plenariam* consequi poterunt *Indulgentiam*, animo voto sese iis sociantes, qui sacellum praefati Ordinis vel urnam Sancti Ioannis Leonardi pie visitaverint, dummodo, coram aliqua pia Sancti imagine, preces ut supra devote recitaverint, doloribus suis vel incommodis propriae vitae misericordiam Deo oblatis.

Praesenti totum per Iubilarem Annum S. Ioannis Leonardi valituro. Contrariis quibuscumque non obstantibus.

Jacobus Franciscus Card. Stafford
IACOBUS FRANCISCUS S. R. E. Card. STAFFORD
Paenitentarius Maior

Ioannes Maria Gervais
Ioannes Maria Gervais
Ad. a Stud.



PAENITENTIARIA APOSTOLICA

Prot. N. 645/07/I


DECRETUM

PAENITENTIARIA APOSTOLICA, vi facultatum sibi specialissimo modo a Sanctissimo in Christo Patre et Domino Nostro, Domino Benedicto Divina Providentia Papa XVI tributarum, Excellentissimo ac Reverendissimo Patri Domino **Benvenuto Italo Castellani, Archiepiscopo Lucensi**, benigne concedit ut, die V mensis Octobris MMVIII, quo sollemniter aperietur Iubilaeum Sancti Ioannis Leonardi, post litatum divinum Sacrificium, impertiat omnibus christifidelibus adstantibus, qui, animo omnino elongato ab affectu peccati, iisdem sacris interfuerint, *papalem Benedictionem cum adnexa plenaria Indulgentia*, suetis sub condicionibus (sacramentali Confessione, eucharistica Communionem et Oratione ad mentem Summi Pontificis) lucranda.

Christifideles qui *papalem Benedictionem* devote acceperint, etsi, rationabili circumstantia, sacris ritibus physice non adfuerint, dummodo ritus ipsos, dum peraguntur, ope instrumenti televisifici vel radiophonici propagatos pia mentis intentione secuti fuerint, *plenariam Indulgentiam*, ad normam iuris, consequi valebunt.

Contrariis quibuslibet non obstantibus.

Datum Romae, ex aedibus Paenitentiariae Apostolicae, die XIV mensis Iunii, anno Dominicae Incarnationis MMVIII.


Iacobus Franciscus Card. Stafford
IACOBUS FRANCISCUS S. R. E. Card. STAFFORD
Paenitentiarius Maior

Ioannes Maria Gervais
Ioannes Maria Gervais
Ad. a Stud.